

প্রাচীন
আসামী
হইতে

প্রাচীন আসামী হইতে

শ্রী প্রমথনাথ বিন্দী

রঞ্জন প্রকাশালয়

২৫-২, মোহনবাগান রো

কলিকাতা

বঙ্গাব্দ ১৩৩৭

প্রিন্টার—ঐপ্রবোধ নান
শনিরঞ্জন প্রেস
২৫-২, মোহনবাগান রো।
কলিকাতা।

মূল্য বারো আনা।

রঞ্জন প্রকাশালয়ের পক্ষ হইতে
ঐপ্রবোধ নান কর্তৃক প্রকাশিত

হে ধানশ্রীতীববাসিনি,
ব্রহ্মপুত্রতীববাসী কবির
স্মৃতির অঞ্জলি
গ্রহণ কবা

আজি আমি বুঝিতেছি কাননে কাননে
ফুটেছে যে লক্ষ ফুল—এক লক্ষ্য তার ;
আজি আমি বুঝিতেছি কি গুপ্ত কারণে
নক্ষত্রের চলাফেরা—নভঃ পারাপার !
আজি আমি বুঝিতেছি এ ব্যর্থ-জীবনে
একটি উদ্দেশ্য আছে, নাহি বেশি আর ;
আমি যে তোমার কবি—জনমে মরণে
একটি সঙ্গীতে রচি গীতালি তোমার ।

সমগ্র জীবনে মোর একটি সাধনা—
সকল-সার্থক-করা একখানি গান
ঝটিকাতে ছিন্ন এক কমলের প্রায়
লুটাবে তোমার পায়ে ; তোমার খেলনা
হয় যেন জীবনের যত কিছু দান !
হাস্ত মুখে লবে তুমি আছি সে আশায় ॥

পশ্চিম-দিগন্ত আমি, জ্বলন্ত রবির
 বাসনার চিতা-শয্যা ; তুমি সখি দূর
 পূর্ব বনান্তের রেখা—অতল গভীর
 রহস্যের অধিনেত্রী ! মোরে দন্ধ করি
 জ্বালাই বহির শিখা—তারি দৃপ্ত রাগে
 হেরিতেছি কান্তি তব মূর্ত্তায় বিধুর !
 মিলিয়াছে তব অঙ্গে দিবস-শব্দরী,
 দেখা-না-দেখার প্রান্তে তব মূর্ত্তি জাগে

কোথা তুমি, কোথা আমি, শূন্যতা অগাধ,
 বুকে বুকে পরশন—ঘটিল না কভু !
 কেবল চুলের গন্ধ, শয্যা ক্ষুধাতুর,
 শুধু সৌন্দর্যের কশা—কষায় মধুর !
 উঠিল গভীর রাতে দ্বাদশীর চাঁদ—
 অখণ্ড দিগন্তে হেরি ঘেরা দৌহে তবু ॥

এ প্রেম সুন্দর সখি, এ প্রেম সুন্দর !
 আর কিছু নাই হোক—এই যে একদা
 দেখা হয়েছিল পথে, ক'য়েছিলে কথা,
 চলে যেতে নয়নেতে জল ভর-ভর ।
 এ প্রেম সুন্দর সখি, এ প্রেম সুন্দর !
 বহে নিয়ে এল কোন্ রসাতল হ'তে
 এ যে কার অভিলাষ ! প্রদীপ্ত আলোতে
 শিশির-মসৃণ কুঁড়ি একটি কুন্দর !

এ প্রেম সুন্দর সখি ! জানি না কোথায়
 কেমন সে সার্থকতা ! তবু বা কি কম !
 মুহূর্তের স্বপ্ন লাগে অনন্তের প্রায় !
 ছ'দণ্ডের পরিচয়ে হ'লে প্রিয়তম ।
 যুগল গ্রহের মত স্থির মহিমায়
 চির প্রদক্ষিণ-রত ! বিস্ময় পরম ॥

তোমার কল্পনা সখি, বাতাসে বাতাসে
 ছড়িয়ে পড়েছে, বহু বনান্তরবাহী
 গন্ধসমঃ; হেরিতেছি স্বপ্নে অবগাহি,
 অজ্ঞাত এ বিশ্বপানে সলজ্জ উল্লাসে
 যৌবন-পীড়িত দুটি বন্ধ আছে চাহি
 সঙ্কোচে উন্মুখ ; বাণী নাহি নাহি
 অকিঞ্চন অধরের ; খুঁজে মরে কথা
 লাবণ্য-মসৃণ দুটি ব্যগ্র বাহ-লতা ।

হেরিতেছি কল্পনায় ব্রহ্মপুত্র-তীরে
 একা তুমি ; সন্ধ্যা হ'লে বাঁধিতেছ চুল,
 ললিত ভঙ্গিমাভরে, বাঁকাইয়া ধীরে
 বাহু দুটি ; গ্রীবাম্পন্দে দোলাইয়া ছল
 আঁকিছ সিন্দূর ভালে—তখন তিমিরে
 প্রথম মুঞ্জরি ওঠে তারার মুকুল ॥

গ্রীষ্ম-ক্ষীণ তিস্তা-সম, তবী তব আজি
 দেহের অস্তিত্ব গেছে কোথায় নামিয়া !
 কোথা সে চটুল লাস্ত্র, লীলামীন রাজি !
 তনুতটিনীতে ওই আছে প্রকাশিয়া
 যুগ যুগান্তরবাহী আদিম অক্ষয়—
 নিগূঢ় সে সূত্রখানি ! যার গ্রন্থিতলে
 লক্ষ কোটি জীব আর অনন্ত সময়
 একটি অখণ্ড সত্যে পরিণত হয় !

ধ্যাননেত্র-স্তব্ধ ওই শান্ত সরোবরে
 পড়েছে আলোকচ্ছটা সায়াহ্ন রবির ;
 আমি বসে হেরিতেছি কি বিশ্বয়ভরে
 ধীরে ধীরে স্বচ্ছ ছায়া হতেছে গভীর ;
 এক বর্ণ অলক্ষিতে আরেকের সনে
 কেমনে মিলায়ে যায়, অন্তিম গগনে ॥

স্তন-মঞ্জরীর ভারে আনন্দ তনুকা,
 লঘু পদ হানি যাও যে-নব শাদলে
 পলকে মিলায় তাহা, সাহারার তলে
 ক্ষণ-বৃষ্টি সম ; অয়ি ভাবের বেণুকা,
 বিরহের রক্তে রক্তে বিশ্বের নিঃশ্বাস
 ধ্বনিয়া তুলিছে নিত্য অখণ্ড কি সুর ;
 কখনো নয়ন তব স্বপ্ন-ভারাতুর,
 কভু তীক্ষ্ণ অসিসম মূর্ত্ত সর্বনাশ !

অজানা হাঁসের দল অলৌকিক ডানা
 নীরবে সঞ্চার করি' সাক্ষ্য সরোবরে
 অন্ধকারে মিশে যায় ; শুধু ক্ষণে ক্ষণে
 অযুত বর্ণের ছায়া দিয়ে যায় হানা,
 ভাবে নিমীলিত আঁখি সরসীর পরে,
 গোধূলির মন্ত্র-পড়া সায়াহ্ন-গগনে ॥

বৃষ্টি-ধৌত দিগন্তরে যায় আজি দেখা
 সুদূর ত্রিকূট চূড়া ; যেন মন্ত্রবলে
 সহসা এলো সে কাছে ; সূক্ষ্ম-পথ-রেখা
 প্রচ্ছন্ন ছিল যা ধূলি-কুজ্জাটিকা-তলে
 ফুটিয়াছে অসংশয়ে ; পশ্চিমেতে চাহি
 মনে হ'ল, ওই গিরি ওই নীল বন,
 মাঝে কোনো দিগন্তের বাধা আর নাহি
 হাত বাড়ালেই পাবো কামনার ধন ?

অশ্রু-লঘু চিত্তমাঝে তাকানু সহসা,
 হেরিলাম কুহেলিকা-গুণ্ঠনটি খসা,
 স্মৃতির পদাঙ্ক-আঁকা স্বপ্ন-গূঢ়-পথ—
 তোমার অস্তিত্ব খানি ; যবে মুগ্ধবৎ
 বাড়িয়ে দিলাম হাত উদ্দেশে তোমার,
 বাধা দিল বাসনার দিগন্ত অপার ॥

গুগো মোর জীবনের কৃত্তিকা-মণ্ডল
 এবার বিদায় দাও ; প্রতিদিন সাঁঝে
 পশ্চিম দিগ্ধু যবে গভীর কুন্তল
 বিনায়ে বাঁধিত একা, আধো ত্রাসে লাজে
 তোমরা যে দিতে দেখা, স্নিগ্ধ অচপল
 বকুলবীথির শিরে ; রাত্রি যত বাজে
 জাগিতে পলকহীন, সপ্তর্ষি সু-ধীরে
 নামিত স্নানের লাগি' মানসের তীরে ।

এবার কোথায় দেখা হবে কে তা জানে,
 কোন্ দূর বনান্তরে, কোন্ নদীতীরে !
 গ্রীষ্ম-ক্ষীণ হৃদে হেথা দিবা অবসানে
 সূর্যাস্তবরণচ্ছটা নামিয়াছে নীরে,
 যেন দেব-বালিকারা রত সন্ধ্যাস্নানে ;
 —সন্ধ্যাতারা সকৌতুকী চেয়ে আছে ধীরে ॥

/ আর কিছু না-ই হ'ল ; এই যে তোমার
 এসেছি নিকটে এত, পারি পরশিতে
 শ্রান্ত অঞ্চলের কোণ ; এই যে আবার
 রহস্য-উদাস কেশ, একটি ইঙ্গিতে
 অকস্মাৎ-সন্ধ্যা-সম উপত্যকা মাঝে
 খসে যায় অতর্কিতে ; অধীর অঙ্গুলি
 না জানি কেমন ভঙ্গে, শত তুচ্ছ কাজে
 নিজেরে সবার সাথে গাঁথিতেছে তুলি ।

সত্যেরে কে দেখিয়াছে ! শুধু অন্ধ হাত
 মিছে করে অন্বেষণ ! চেয়ে আছি সখি,
 রহস্য-অগাধ তব অস্তিত্বের পানে !
 কভু চোখে পড়ে তব চম্পক-সম্পাত
 মৃণাল ভঙ্গুর দেহ ; কখনো বলকি
 লুপ্ত বিশ্ব-আত্মাখানি চক্ষে দীপ্তি হানে ॥

ভালো বেসেছিলে সখি একদিন তাই
 আজিও আমার হবে, হেন স্বপ্ন না-ই
 ভাবিলাম মনে । যে প্রেম একদা, খর-
 সূর্য্য তীব্র-রসোচ্ছ্বাসে করেছে ভাস্বর
 দিবসের দিগন্তর—সে আসে আজিকে
 মল্লিকা-মেঘুর-স্পর্শে জ্যোৎস্না-লিপি লিখে,
 অন্ধরাতে তন্দ্রা-সাথে খিড়কি খুলিয়া
 নীলাভ নীরব চন্দ্রে ।

একাকী বসিয়া

ডুবারী যেমন ভাবে, সমুদ্রের তলে
 কোন্ ক্ষণে, কেমনে বা ত্রস্ত হাত স্থলে,
 পড়িল যে মণি খানি, কি মূল্য তাহার,
 কি বরণ, কিবা দীপ্তি, কেমন আকার !
 তেমনি ভাবিব বসি দণ্ড পল গুণি
 কেমনে হারানু তব চুস্বনের চুণী ॥

সে অঞ্চল-ভঙ্গীখানি থাকিয়া থাকিয়া,
 হৃদয়-সীমান্তে আজো উঠিছে কাঁপিয়া,
 ঝড়ের মেঘের প্রান্তে তীব্র বিদ্যুতের
 করুণ রেখার মত ; স্থলিত চুলের
 মদির অধীর গন্ধ, আর্ত অলি প্রায়
 কাঁদিয়া ফিরিছে আজো তারে ঘিরে হায় !
 শুক্ল-পাণ্ডু কপোলেতে ওঠে দ্যুতি ভেসে,
 অতি গুপ্ত বাসনার ক্ষণিক আবেশে ।

অতীতের কশাঘাতে আমি যে পাগল,
 লুপ্তিতে লেগেছি আজ স্মৃতির প্রাসাদ ।
 মুক্তা-ভ্রমে লই যত শিশিরের জল,
 সম্ভব লাগিছে যত সু-দুর্লভ সাধ ।
 সেই যে উন্মুখ গণ্ড, কবরী চঞ্চল,
 হায় সেই গন্ধ, আর হায় সেই স্বাদ ॥

আর কোনোদিন সখি, রক্তরুচি বাসে
 আসিবে না বীথিপথে—মোর জীবনের
 প্রথম উষার মত পূবের আকাশে—
 এই খেদ রয়ে গেল ক্ষুধিত মনের ।
 আর কোনোদিন সখি, অলকে তোমার
 পরিবে না করবীর শঙ্কিত মঞ্জরী !
 আর কোনোদিন সখি, স্বপ্ন-রস-সার
 আনিবে কি অকথিত দুটি নেত্র-ভরি ?

স্মরণের মধুচক্র ভাঙিয়া সহসা
 মুখর হয়েছে মত্ত মধুপের দল ;
 নিঃশেষ করিয়া মধু, এখন কি দশা,
 আপনার বিষে তারা আপনি চঞ্চল !
 বিস্মৃতির কালো জলে সোনার প্রতিমা
 ডুবাইয়া, পাবো নাকি এ দুঃখের সীমা ॥

তুমি ছিলে কৈশোরের পাষণ-পুরীতে,
 আপনারে না জানিয়া তদ্রাতলে লীন ;
 আমি এনু অকস্মাৎ ঘুরিতে ঘুরিতে
 অপূর্ব-পথিক-পথে, পান্থ উদাসীন ।
 যৌবনের স্বর্ণকাঠি খেলিবার ছলে,
 সহসা রাখিনু সখী শিথানে তোমার,
 অজ্ঞান তুষার গলি নয়নের জলে,
 শ্যামলতা প্রকাশিল গিরিশ্রেণী তার ।

চরণের চঞ্চলতা রাজিল নয়নে,
 কৈশোরের প্রান্তে এলো প্রথম গোধূলি,
 অলক্ষ্য বীণার তারে যেন ক্ষণে ক্ষণে,
 কেঁপে ওঠে মূর্ছনায় দশটি অঙ্গুলি ।
 মনে রেখো, আমিই সে দিয়েছিলাম বলে
 তুমি নারী—সর্ব আগে—এই বিশ্ব-তলে ॥

ওই পূর্ণ শশী-পানে চেয়ো সখী চেয়ো,
 আমিও চেয়েছি জেনো ওরি মুখ পানে !
 ছ'জনে দৌহার কাছে আজিকে অজ্ঞেয়,
 কোথায় রয়েছি দৌহে—কেহ নাহি জানে ।
 তবু ওই পূর্ণ শশী, এক গুপ্ত টানে
 টানিতেছে লক্ষ হিয়া—জেনো সখী জেনো ;
 কাহারো অমৃত আছে, বিষ কারো প্রাণে,
 তোমার যা থাকে সখী, মোর তরে এনো ।

মোরা সখি ইন্দ্রধনু, কল্লনা-সম্বল,
 এক ফোঁটা হাসি আর অশ্রু ভেঙে গড়া ।
 ভাবিলে ভাবিতে পারো নিতান্তই জল !
 কিন্তু কি ভাবিতে নারো—এই বসুন্ধরা
 প্রেমের কপোলে বিন্দু অশ্রু ছল ছল,
 প্রেমের অধরে হাসি—আলো সূর্য্য-ভরা ॥

আর কি সুন্দর আছে বল তার চেয়ে !
 কুণ্ঠিতা কিশোরী এক, লাবণ্য-মুকুলা
 থর থর ; উঠিবারে যেন চায় বেয়ে
 দুর্গম এ বিশ্বতরু ; সরম-দুকুলা,
 গুণ্ঠিতা পুন্ডকে শুধু ; গৌরীশৃঙ্গ-শিরে
 সনাতন স্পর্শহীন তুষারের মত
 বক্ষ দুটি—মগ্ন আজো রহস্য তিমিরে—
 নিজেই জানে না তব্বী মূল্য তার কত !

তারপরে একদিন অকস্মাৎ এলো
 শানিত নিঃশ্বাস এক ; উঠিল নড়িয়া
 কৈশোর-স্বপন-ভিত্তি ; ঝঙ্কা এলোমেলো
 সকলি উলটি দিল ; তুষা-ক্ষুর হিয়া
 জাগিয়া উঠিল ধীরে—আসিল চুপন,
 এলো প্রেম, এলো জন্ম, আসিল মরণ ॥

আমি ভালবাসি সখী, স্তব্ধ ফেনিলতা
 মুক্ত কুন্তলের তব, পড়ে যবে ঝরি !
 তারো চেয়ে ভালবাসি তব বর্ণী বর্ণিলতা
 মল্লয়া-মদিরা তব গ্রীবাটি আবরি' ।
 আমি ভালবাসি সখি, আলস্য-রভসে
 ভাবনা-মন্তর তব ভাবুক-চরণ,
 তারো চেয়ে ভালবাসি অবকাশ-রসে
 অসম্বৃত অঞ্চলের মত্ত বিচরণ ।

আমি ভালবাসি সখি, স্বপ্ন-লঘু-রবে
 শুক্ল-শুভ্র হাসিটুকু অধরে তোমার ;
 তারো চেয়ে ভালবাসি সেই হাস্য যবে
 চকিত ময়ূর করে কলাপ বিস্তার ।
 আমি ভালবাসি সখি তোমার ও তনু,
 তারো চেয়ে ভালবাসি যা তব অতনু ॥

✓ সেই ভালো ছিল সখী—দুজনে যখন
 আধেক সংশয়ে ছিন্তা আধো পরিচয়ে,
 ভুলেও তো কেহ কারো চাহি নাই মন
 খেলা ভেবে দুইজনে ছিন্তা মত্ত হ'য়ে।
 সেই ভালো ছিল সখী দুজনে তখন
 দিয়েছি নিয়েছি ফুল কতনা সময়ে—
 সে ফুলে কখনো মালা করিব রচন
 এ কথা স্মরিয়া কত হেসেছি উভয়ে।

অচ্ছাদ নদীর নীরে উপল সমান
 দুজনের মন আজি দুজনের চোখে—
 অতি-পরিচয়ে আজি দুইটি পরাণ
 বারে বারে কেঁদে ওঠে অতৃপ্তির ঝোঁকে।
 গোধূলি-গুণ্ঠন তলে প্রথম প্রদোষে
 তাহারেই খুঁজি পুন যে আছিল ব'সে ॥

এ নহে মাটির ঢেলা আঘাতে তোমার
 ভেঙে যাবে শতখণ্ড । জ্বলন্ত অঙ্গার
 যতই আঘাত তারে করিবে সুন্দরী
 উঠিবে অপূর্ব হ'য়ে ইন্দ্রজালে ভরি ।
 তোমাতে পেয়েছে যারা হাতের মুঠায়
 তাহারা পেয়েছে শুধু ধূলা বালি হায় !
 আমি দেখিয়াছি সেই মানস-প্রতিমা
 কালে কালে দেশে দেশে নাহি যার সীমা

আমি দেখিয়াছি সেই আনন্দ-সঘন
 বিশ্বের আদিম চেষ্টা—যে প্রাণ এখনো
 স্বচ্ছন্দ ছন্দের ভরে যুগে যুগে চলে
 নব নব জীবনের খিলানের তলে,
 আপনি না পায় অন্ত আপন মহিমা
 আমি দেখিয়াছি সেই আনন্দ-প্রতিমা ॥

পড়িবে পড়িবে মনে এই কথা সখী,
 স্মৃতীক্ষ্ম স্মৃতির অসি সেদিন ঝলকি
 অতীতের খাপ হ'তে উঠিবে সহসা ;
 সেদিনের সন্ধ্যাখানি মনে হবে ঘষা
 সুবর্ণ-মুদ্রার মত পশ্চিমের দিকে,
 ওই রক্ত বাসখানি মনে হবে ফিকে ;
 হেমন্তের হৈম আলো কঙ্কণে আসিয়া
 মূরছি পড়িয়া যাবে উঠিতে হাসিয়া ।

অবসন্ন দিবসের বিষন্ন প্রদোষে,
 নির্জন বলভিতলে সঙ্গোপনে ব'সে,
 কাহারে উদ্দেশ্য করি নক্ষত্র-সভায়
 মর্ম্ম-বিগলিত গান গাবে একা হায় !
 ব্যর্থ গান আসিবেক তব কাছে ঘুরে
 সেদিন সেজন রবে কত কত দূরে ॥

জানি আর স্বর্ণপদ্ম ফোটে না ধরায়,
 কমল-উন্মুখ প্রাতে পম্পাতীরে হায়
 লঘু-পায়ে অঙ্গরীরা স্নান সাজ করি
 অবসন্ন-কেশ হতে মন্দার-মঞ্জরী
 ফেলে রেখে নাহি যায় ; সুন্দরীসমাজ
 স্বর্গমন্দাকিনীকূলে স্বপ্ন শুধু আজ ।
 আসন্ন আশ্বিনে এই ভোরের আঁচল
 ভরি তোলে বারে বারে শিশির-উজ্জ্বল
 ক্ষণ-স্বর্ণশস্যকণা ; দিগন্তের পরে
 পরিপক্ক রৌদ্রগুচ্ছ পূর্ণতার ভরে
 আনমিত ধান্যশীর্ষ ।

এই কিবা কম !

সবারে করিয়া পূর্ণ আছ প্রিয়তম—
 স্থলিত অঞ্চল আর গলিত কবরী,
 ললিত কোতুকে ছুটি কলনেত্র ভরি ॥

এই যে ছুঁয়েছি আজি তোমার অঙ্গুলি,
 গীতি-ক্ষুব্ধ বক্ষ তব হে স্তুতি-চঞ্চলা,
 দীপশিখাসম কম্প নাড়ীতে আকুলি
 বিরহ-মিলন-বার্তা করে ফেরা-চলা ।
 এই যে কপোলে তব প্রভাতেরো আগে
 উষার আভাস কাঁপে পূর্বরাগসম,
 রহস্য-গভীর তব কুন্তলের রাগে
 অন্ধকার মূরছায়—এই কিবা কম !

জানি জানি গ্রহ সূর্য্য কিসের পিয়াসে
 পুঞ্জনীহারিকা হ'তে সূত্র তুলি তুলি
 আলোকবসন বোনে ; জানি জানি সখী,
 চিহ্নহীন কোন্ পথে বর্ষে বর্ষে আসে
 শিশিরকুণ্ঠিত শাখে ভ্রান্ত ফুলগুলি,
 হঠাৎ-সৌরভ যার দেয় রে চমকি ॥

শেফালি-বিমুক্ত আর শিশির-মসৃণ,
 আলোক-চিকণ এই শরতের দিন
 পড়ে আছে পক-প্রায় ধাতুক্লেত্র পরে,
 আলস্য-আবেশময় আনন্দের ভরে
 প্রসারিয়া সুবিপুল পক্ষ দুটি তার
 স্বর্ণ-ঈগলের মত । মনে লাগে আর
 ভোরের যে সরোবরে প্রথম কলস
 এখনো হয়নি ভরা, মৌন নিরলস
 তারি মত প্রভাতটি !

সব মিলে আজ
 আলোক, শেফালি, ধাতু, শিশিরের লাজ,
 ঘন কালো বনরেখা দূর-দিগন্তের,
 তার চেয়ে কালো কত দৃষ্টি নয়নের,
 মধুভারে ভগ্নচাক মৌমাছির প্রায়
 চিত্তে মোর গুঞ্জনের খঞ্জনী বাজায় ॥

ফুল যদি বন্ধ হ'য়ে হয় পুন কুঁড়ি !
 সতেরো বছর তব যদি গিয়ে ঘুরি
 বাহিরে আসিতে চলি বালিকা-বয়সী !
 উদ্ভিন্নযৌবন তব হৃদয়েতে পশি
 ঘুমায়ে পড়িত নদী-তরঙ্গ সমান
 বাতাসের অবসানে । আনিতাম দান
 যা কিছু বলিত ভালো অবোধ নয়ান—
 একটি ধানের গুচ্ছ শিশির-স্বলন,
 নাবালক শেফালিকা ; পথ গিয়া ভুলি
 অবাক দাঁড়াতে মুখে পুরিয়া অঙ্গুলি ।

দেখিতে বিষয়ে—তব হাস্ত কোলাহলে
 চকিত কাঠবিড়ালী শালছায়া তলে
 দূরে গিয়া তব পানে রহিত চাহিয়া ।
 আজি আমি জাল বুনি সেই স্বপ্ন দিয়া ॥

এই যে তোমারে আজি হেরিতেছি চোখে
 বাসনা-বিশাল দুটি আঁখির আলোকে,
 এই যে পলক লাগি পারি পরশিতে
 তোমার আঁচলখানি ; ফুল খুলে দিতে
 কবরী খসিয়া পড়ে, আকাশের পথে
 নীড়গামী বলাকার ক্লান্ত পাখা হ'তে
 স্বচ্ছ আঁধারের মত, গোধূলির পরে ;
 শিশির-বাহিত দুটি অকলঙ্ক করে
 আপনারে নানাভাবে তুলিতেছ পূরি,
 নিজের রূপের সনে এই লুকোচুরি,
 এই ক্ষণে ভরে-দেওয়া, এই পুনরায়
 অঙ্গের সীমান্তে অঙ্গ মিলায় মিলায় ;

কিছু যার দেখিয়াছি কিছু দেখি নাই,
 একদিন মনে হবে অপূর্ব ইহাই ॥

শিশির-মসৃণ কেশ খুলে দাও সখী
 দেখি বসে তারা ঝরা ; মুক্তাস্বচ্ছ হাতে
 ভীকু ভঙ্গিমায় আঁকো আকাশের পাতে
 আন্দোলন আলিম্পন ; উঠুক ঝলকি
 তমালতরল ঘন নয়নে ছলকি
 বিরহ-সঙ্কেত-রেখা ; বসনে, শয্যাতে,
 নিজেই ছড়ায়ে যাও সকলের সাথে,
 আমি তাই খুঁটে ফিরি পরখি' পরখি' ।

পারাবতপদপাণ্ডু চন্দ্রের হ'ল কি !
 গলে' গেল নভপ্রান্তে ! সপ্তর্ষি সভাতে
 শিশির-মার্জিত আঁখি জাগে বেদনাতে
 একা অরুন্ধতী ক্ষুব্ধ জগতে নিরখি' ।
 হে আমার অরুন্ধতী স্বপ্নহীন চোখে
 দেখিছ কি সৃষ্টি চলে মোর মর্ত্যলোকে !

তোমাতে বেসেছে ভালো কতই না লোকে !
 বাসনা-বিশাল কত আঁখির তুলিকা
 সর্ব অঙ্গ ঘিরি তব লিখিয়াছে লিখা
 তৃপ্তিহীন কামনার অক্ষয় আলোকে ।
 আমি বেসেছিছু ভালো অন্তরে তোমার
 যুগল ভুরুর কালো খিলানের তলে
 আত্মার রহস্য-দীপ বহিয়া যে চলে
 সেই তীর্থ-পথিকারে চির-যাত্রা যার ।

যদি কোনো দিন সখী কালের অঙ্গুলি
 স্পর্শ করে রূপ তব মলয়া-মদির,
 অনির্বাক্য আলোকেতে সেই শিখাটির
 তোমাতে চিনিয়া লব—যাবো নাকো ভুলি ।
 দিগন্তের বাহুপাশ কাটাইয়া ক্রমে
 চির ছায়াপথে যাত্রা কর প্রিয়তমে ॥

নূতন বন্ধুর মাঝে পাবে তুমি ঠাই
 নূতন নদীর কূলে নব তৃণতীরে,
 নূতন ভাষায় কথা কহিবে সদাই
 কত না নূতন মুখ তোমা সখী ঘিরে,
 সত্য মিথ্যা কভু হেসে কভু অশ্রুণীরে ।
 সে সময় মনে রেখো চিরঅস্তহার।
 পুরাতন গৃহে তব ওঠে সন্ধ্যাতারা ।

নূতন বসন্তে সাজি ভরিবে তোমার
 মালিকা গাঁথিতে পাবে নব নব ডোর—
 মনে রেখো সে সময় হেথাও আবার
 ফুটেছে নূতন ফুল শ্রুগন্ধি-বিভোর,
 মুকুল-বিলাসী নব পিক গাহে জোর ।
 সেদিন নূতন চূলে গুঁজি যদি ফুল
 রাগিয়ো না জেনো তাহা নূতনের ভুল ।

যাবে সখী চলে যাবে—যাবে শুধু তুমি
 আর সব পড়ে রবে—যাহাদের সাথে
 মিলিয়া সম্পূর্ণ ছিলে—এই বনভূমি
মূর্ছনায় মূর্ছাতুর—তব পদপাতে ।
ইহাদের বাদ দিলে কতটুকু তুমি !
 এই মালতীর লতা, শিরিষের ছায়া,
 এই যে মাধবী-শাখা রয়েছে কুসুমি,
 সবে মিলি তবে তুমি একখানি মায়া ।

যে তরুতে দিতে জল সোদরের স্নেহে,
 যে দোলায় দোল খেতে অবকাশ-রসে,
 শত তুচ্ছকর্ম নিয়ে পশিতে যে গেহে,
 বাতায়নে দাঁড়াইতে আলস্য-রভসে ।
 যেখানে বসিতে তুমি সেথা গিয়া বসি
 আর কি করিতে পারি—অয়ি সপ্তদশী ॥

বিস্মৃতির বৈতরণী পার হ'য়ে সখা
 চলে যাবে জানি তাহা—তবু কি বলকি
 অতীতের সিন্ধু হ'তে স্মৃতির ঝিল্লুক
 একটিও উঠিবে না—ভাবি এইটুকু !
 মনে রেখো বীথিপথে, শুষ্ক পল্লবের
 মঞ্জীর উঠিবে বাজি—কাঠবিড়ালের
 তব পদধ্বনি আশে কাটিবে সময় ।
 মনে রেখো—আরো কেহ সেথা জেগে রয় !

আরেক বসন্তে সখী ক্ষুর সমীরণ
 বনের অঞ্চলে গ্রন্থি দিয়েছিল হায়,
 বলেছিল—‘মনে রেখো মনে রেখো, বন
 হাসি মুখে নিয়ে ফিরে আসিব যখন ।’
 বন কি চিনেছে তারে বুঝা নাহি যায় !
 হাসিছে না কাঁদে ওই তরু-মন্মথরণ ॥

মৃণাল-রুচির তব উন্মুখ অধরে
 যদি বা অঙ্কিত করি অবলীলাচ্ছলে
 বঙ্কিম চুস্বনরেখা—জেনো প্রিয়তম
 মুহূর্ত্তে তা মিলাইবে ইন্দ্রধনুসম
 ক্ষুণ্ণ গগনের কোণে । অয়ি অসহায়,
 মৃত্যুর ইঙ্গিত-তীক্ষ্ণ-ছুরিকার প্রায়
 কুণ্ঠিত গ্রীবায় তব অধরের রেখা—
 সে তো শুধু অস্তনভে ক্ষণিকের লেখা—
 মুমূর্ষু মণিকা এক । যাহা থাকিবার
 আপনি তা থাকে—কেবা খোঁজ রাখে তার !

ত্রিবলী সোপান অঁকা ক্ষীণ মধ্য তব
 নিয়ে যাবে উচ্ছে মোরে, যেথা অভিনব
 অপূর্ব মন্দির আছে ; তবু আজি এই
 সোপানেরে ভালবাসি—তার বেশী নেই ॥

কারো ভালো লাগে কেশ ; কাহারো আবার
 মল্লয়া-নিটোল গাল ওঠে যা কুসুমি'
 আধেক ইঙ্গিতে সখী গুপ্ত বাসনার ;
 কিন্তু সখী ভালো লাগে তোমার যে তুমি ।
 কারো ভালো লাগে শুধু গন্ধ-অনুমান
 পল্লব-বিলীন বন্ধ আছে যা কুসুমি' ;
 কাহারো বা ভালো লাগে নিশিত নয়ান ;
 কিন্তু সখী ভালো লাগে তোমার যে তুমি ।

ইন্দ্রিয়ের ইন্দ্রজাল দেখিয়াছি টুটি'
 তাই তো ধরিতে চাই অস্তিত্ব তোমার ;
 দেহের জঞ্জাল আর ধূলি দুই মুঠি
 পারিবেনা ঢাকিবারে রহস্য আত্মার ;
 যে বৃত্তে ও তনুখানি উঠিয়াছে ফুটি
 আমি চাই দেখা তারি--নহে কম তার ॥

তোমার সৌন্দর্য্য সখী, বিষতীক্ষ্ণ শর
 বিঁধিয়াছে বন্ধে মম । বিহ্বল কেশের
 মদির অধীর গন্ধে এই অভাগ্যের
 আপাদমস্তক সখি পুলক-জর্জর ।
 ওই দৃষ্টি, ওই ওষ্ঠ, ওই যে অধর,
 ওই কণ্ঠ, ওই বাহু, শ্রান্ত অঞ্চলের
 তালে তালে ওঠা-পড়া মুগ্ধ ও দেহের,
 পরশ-বল্লভ ওই নগ্ন পয়োধর ।

তোমার সৌন্দর্য্য সখী, তীক্ষ্ণশর সম
 আমার অস্তিত্ব ভেদি করিল মোচন
 স্বপ্ন-সুশীতল এক রুদ্ধ ভোগবতী ।
 অনন্ত কালের মাঝে আয়ু তুচ্ছ মম,
 জীবনশিয়রে বসি অনন্ত মরণ,
 অনন্ত পিয়াসা হায়, পাত্র ক্ষুদ্র অতি ॥

কুয়াশা-অঞ্চল-তলে গৌরীশৃঙ্গ-শিরে
 শুভ্র তুষারের মত তব বক্ষ ছুটি
 লাবণ্য-রভস-রসে রহিয়াছে ফুটি,
 পরিপূর্ণ কামনার সুধাকল্প নীরে ।
 কোথা সেই ভগীরথ যে তাহারে ধীরে,
 আনিবেরে ভস্ম-লীন চিত্ত-সিন্ধুতীরে !
 কোথা সেই ভগীরথ যার শঙ্খধ্বনি
 বিগলিত করি তারে বহাবে আপনি ।

সহে না সহে না সখী পরম বিচ্ছেদ
 দেহে দেহে ভাগ হ'য়ে প্রাণে প্রাণে মিল !
 কেমনে যে ঘুচে বাধা তপ্ত ইন্দ্রিয়ের
 সেই তো সমস্তা ভাবি মরিছে নিখিল ।
 জ্বলুক অলোক-বহ্নি যুগল দেহের
 পুড়ুক অরণি কাষ্ঠ হ'য়ে তিল তিল ॥

একদিন দিয়েছিল বিদায়ের ক্ষণে
 করবীর গুচ্ছ এক ; তুমি তারে সখী
 কি জানি কি ভেবে মনে করবীর সনে
 গেঁথেছিলে ; কালো চুলে উঠিল ঝলকি
 বাসনা-বিদ্যুৎলতা ; তার পরে কবে—
 সন্ধ্যার কেশের মাঝে ফুল সূর্য্যমুখী
 যেমন ঝরিয়া যায়—তেমনি নীরবে
 ঝরে গেছে পুষ্প মোর—সব গেছে চুকি ।

সেই হ'তে পুষ্পদল রক্ত করবীর
 লভিয়াছে গুণ সখী স্পর্শ-মাণিকের ;
 যেখানেতে ছোঁয় সেথা ওঠে ঝলকিয়া
 বেদনা-কনক-বহি ; বুভুক্ষু স্মৃতির
 অসংখ্য নাগিনীদল, ভেদি পাতালের
 বাসনার তপ্ত গুহা ওঠে চমকিয়া ॥

এমন সুন্দর তুমি কে জানিত আগে !
 শঙ্কিত সঙ্ক্যার তারা আসে রে যেমন
 কুণ্ঠিত গুণ্ঠন টানি', অস্ত-রবি-রাগে
 আলোক-উন্মুখ চোখে পড়ে কি তখন !
 তারপরে একেবারে দিগন্তের কূলে
 বিদায়-পাণ্ডুর মুগ্ধ শশিকলা সম
 দেখা দিলে অকস্মাৎ—ক্ষুব্ধ আঁখি তুলে
 'ওই বুঝি' বলিতেই গেলে প্রিয়তম ।

অন্তরবাসীরে কেবা দেখেছে নয়নে !
 দেখিয়াছি মেঘ-পাণ্ডু বসন তোমার—
 কুঙ্কুমকোমল কর কুণ্ঠিতকঙ্কণে
 অদৃশ্য বীণার তারে কাঁপে বারম্বার !
 যতটুকু দেখি নাই আছ ততখানি
 দ্বিতীয়ার চন্দ্র বলে পূর্ণিমার বাণী !

দূরে যেতে দাও সখী, এতদিন তোরে
 রাখিয়াছি চোখে চোখে—দেখেছি তোমার
 কি ইঙ্গিত কি আভাস অব্যক্ত অধরে
 সহসা ঝলকি ওঠে ; দেখিয়াছি আর
 মুক্তা-স্বচ্ছ কপোলের অন্তরে অন্তরে
 রক্তের বরণচ্ছটা, কর্ণ-অলঙ্কার
 কেমনে মলিন করে ; তব নেত্রপরে
 সহস্র বর্ণের ছায়া ভাব-বলাকার ।

দূরে যেতে দাও সখী ; বুকের ধরায়ে
 সূর্য্য আজি কত ভাবে ঘুরায়ে ঘুরায়ে
 চেয়ে দেখে তৃপ্তিহীন ; বিচ্ছেদ দৌহার
 মেঘে মেঘে অঙ্গরীরা আলিম্পন-ভারে
 আঁকি দেয় ক্ষণে ক্ষণে ; অনন্তের গায়ে
 শূণ্ড ছায়াপথ সেতু গাঁথে বারম্বার ॥

একদিন ছিলে তুমি, ধরণীর মেয়ে
 সুখে দুঃখে সমাবৃত আমাদেরি মত,
 আজি শুদ্ধ নীলিমায় নিষ্পলক চেয়ে
 রহস্য-সুদূর লোকে আছ নিদ্রানত ।
 শিয়রে প্রদীপ জ্বালি ধ্রুবতারকার,
 সপ্তর্ষির তপোবনে, অয়ি অরুন্ধতি
 কোনো কোলাহলে তন্দ্রা ভাঙেনাকো আর,
 কোনো দুঃখে আজি তব নাহি কোনো ক্ষতি ।

তেমনি তেমনি তুমি ছিলে একদিন
 নিশ্বাস-দোহুল এই বন্ধের ছায়ায়,
 আজি তুমি স্বপ্নলোকে রয়েছ নিলীন
 জীবনের ক্ষুদ্রগীতি পশে না যেথায়
 এ পারেতে ছিলে তুমি আমারি খানিক
 ওপারে তুমিই সখী ধ্যানের মানিক ॥

তোমার অস্তিত্ব মাঝে রহস্য-বধির
 জ্ঞানের উত্তর দ্বার, মোর কাছে সখী
 রাখিয়োনা রুদ্ধ করি ; যত হেরি তোমা
 তত বেড়ে যাও তুমি, লজ্জিয়া উপমা
 ভাঙ্গি কল্পনার সীমা ; তোমার মন্দির
 আঁখির আলোকপাতে, সহসা ঝলকি
 ওঠে ছ'একটি গান, ছ'একটি ব্যথা ।
 তবু থেকে যায় বাকি লক্ষ লক্ষ কথা ।

জনমে জনমে সখী নব নব বেশে,
 মরিয়াছি অন্ত খুঁজে তব অস্তিত্বের ;
 ললিতা ধানশ্রী যেথা ব্রহ্মপুত্রে মেশে
 এবার সেথায় তোমা লভিলাম ফের ;
 আধখানি ইন্দ্রধনু নীলিমার দেশে—
 আর অর্ধ দেখ সখী ছায়াতে জলের ॥

এ জীবন অতি ক্ষুদ্র—তাই সখী তোরে
 ভালবাসি ; এ জীবন, আশ্বিনের ভোরে
 কল্পিত পল্লব হ'তে মুমূষু শিশির
 তৃণ-তলে ; এ জীবন, বসন্ত-নিশির
 অতৃপ্ত স্বপন যেন, লয় নিদ্রা হ'রে ।
 তাই ভালবাসি সখা তাই বাসি তোরে ।

সমুদ্রে তো সুধা নাই—সুধাপাত্র
 তাই নিয়ে টানাটানি ; একবার ধার
 তোমার অধর-প্রান্তে ; তুমি আরবার
 আমার অধরে ধরো ; এ বিদ্রূপ স্মরি'
 উভয়ের কত হাসি ! স্বর্গ করে ধূ ধূ
 শুষ্ক শূন্য ছায়া-তাত্র বৈতরণী-পার ;
 একটি মুহূর্ত্ত শুধু হাতে আছে ওরে,
 লক্ষ গুণ তাই আমি ভালবাসি তোরে ॥

একদিন দেব দৈত্য-দাঁড়াইল আসি
 আদিম সমুদ্রতটে মত্ত কুতূহলে ;
 তারপরে অকস্মাৎ চিত্তে কিবা বাসি
 ঝাঁপ দিল ভয়শূন্য মৃত্যুগূঢ় জলে ।
 আমিও তেমনি সখী তোমার দেহের
 বাহুর দিগন্তঘেরা মত্ত পারাবারে
 ঝাঁপ দিছু এইবার ; কোথা অন্ত এর
 সন্ধানি দেখিতে হবে সেই সত্যটারে ।

কোথা তুমি—কোথা তুমি এ চির-সন্ধান
 মিটিল না আজো হায়—সংশয়রূপিণী !
 অকারণে গাঁথি লয়ে বরমাল্যখান
 যার পিছে ছুটে মরি—তারে নাহি চিনি !
 ইন্দ্রধনু মাঝে তুমি সেই বর্ণখানি
 চোখে যা পড়ে না—তবু চিত্ত বলে জানি ॥

নির্বাপিত অগ্নিগিরি, তবু তা'রে সখী
 ক'রো না বিশ্বাস কভু পলকেরো তরে—
 অন্তরে কি ব্যথা তা'র উঠিছে বলকি
 বাহির হইতে তাহা কে বলিবে ওরে !
 নিশিত-অস্ত্রের মত এ মোর যৌবন
 রাখিয়াছি বিস্মৃতির কালো ঝাপে ভরি ;
 এসো না এসো না কাছে, কি জানি কখন
 তোমাতে আঘাত করে সেই ভয়ে মরি !

✓ মাঠ-শালিখেরা কাঁপে ধূসর-ডানায়
 দধি-পাণ্ডু শশী দোলে আকাশের কোল-
 স্বপ্নে-পাওয়া বায়ু ফেরে শাল-বনে হায়
 প্রবালের রসে ভেজা পূবের অঞ্চল ।
 নিজ মনে ভয়, তাই এমন নিশীথে
 তোমাতে বলিতে নারি নিকটে আসিতে

নেভে নাই সে আগুন ! শুধু এতদিন
 বিস্মৃতির অন্ধকারে সমাহিত প্রায়
 ছিল সুপ্ত । কি নিষ্ঠুর কৌতুকেতে হায়
 কে তারে তুলিল ধরি—সেই অগ্নি ক্ষীণ ।
 নেভে নাই সে আগুন ! শুধু চিত্ততলে
 আপনারে দগ্ধ করি রেখেছিল জ্বালি
 একটি অস্তিম শিখা । কে দিল রে ঢালি
 স্মৃতির চন্দন কাষ্ঠ ক্রুর কৌতূহলে !

✓ কেন তুমি এলে সখী ! যে পথের পরে
 তোমার চরণ-চিহ্ন নিঃশেষে মুছিয়া
 জেগেছে নবীন ঘাস ! ভাবিছ কি মনে
 একা আমি দগ্ধ হ'ব ! এ চিতাগ্নি-ভরে
 আমি যাবো, তুমি যাবে নিশ্চিহ্নে ঘুচিয়া !
 কেউ রক্ষা পাবে না এ খাণ্ডব দহনে ॥

যে দিকে নয়ন তুলি, হেরি চিত্রবৎ
 শ্যামা ধরণীর স্নেহ উঠেছে উচ্ছ্বাসি'
 সুনীল পর্বত শৃঙ্গে ; তরঙ্গিত পথ
 গেছে দূরে ; স্নান রবি, দেখা দেয় আসি'
 বন্য কৃষ্ণসার সম সন্ধ্যার আঁধার
 কোন্ গুপ্ত গুহা হ'তে মেলি ব্রহ্ম আঁখি ;
 পশ্চিম পর্বত-চূড়া ধীরে হ'য়ে পার
 মল্লয়া-পাণ্ডুর চাঁদ স্বপ্ন দেয় আঁকি' ।

/ জানি জানি কি আনন্দে ফুল হয় ফল ;
 দ্বিতীয়ার ক্ষীণ শশী পলকে পলকে
 ধেয়ে চলে পূর্ণিমায় ; বিশ্বের অতল
 রহস্য ভেদিয়া তুমি কেমনে এ চোখে
 ধরা দিলে ! কে বলিবে কেমনে আবার
 ————— ছেলে ছ'লে একান্ত আমার ॥

ভুলুষ্ঠিত কলাপের চিহ্ন দিয়ে আঁকা,
 পুন্নাগের পুষ্পলীন এই বনস্থলী ;—
 ফণী-মনসার ফুলে হ'য়ে গেছে ঢাকা
 কঠিন কটাক্ষে ভরা কণ্টক-আবলী ।
 বন্ধুর দিগন্তরেখা ধীরে হ'য়ে পার
 খর সূর্য্য ডুবে গেল পীতালোক শ্রোতে
 বন্য হরিণের মত সন্ধ্যার আঁধার
 বাহিরিল কোন্ গুপ্ত গিরি-গুহা হ'তে ।

/ অবসন্ন কেশ বাঁধি অবলীলাচ্ছলে
 অতৃপ্ত অঞ্চল টানি বন্ধের উপর
 শিশির-তরল নেত্র ভরি কৌতূহলে
 লঘু নৃত্যে এস সখী বনের ভিতর ।
 বন-চামেলির ফুল দিব তোমা তুলি
 / কি ভয় আসিলে পথে হঠাৎ গোধূলি ॥

গোধূলির চিতাভস্ম সর্ব অঙ্গে মাখি
 চলে গেল অস্তপথে বিরাগী দিবস—
 মণিবন্ধচ্যুত শেষ রবি-রশ্মি-রাখী
 ফেলে গেল অবহেলে বীত-সর্ব-রস ।
 স্মৃতি-বিভূতিতে তব সর্ব তনু ঢাকি
 আজি আমি ঘুরিতেছি গৃহ হ'তে দূরে
 কভু জন-কোলাহলে কখনো একাকী
 সর্বদাই চিত্ত বাঁধা তব মুগ্ধ সুরে ।

বৈশাখের খর রৌদ্রে তাম্র গিরি-চূড়ে
 প্রাসাদ-প্রাকার জাগে অতীত-অঙ্কিত ;
 ইম্পাত-ধবল গঙ্গা চলে ঘুরে ঘুরে
 বালুর বন্ধন-ডোরে বড়ই শঙ্কিত ।
 নল-দয়মন্তী সম এ ছুটি প্রাণীরে
 অথগু বসন-ভাগ্য কোথা টানে ধীরে ॥

এই ব্রহ্মপুত্র বারি ছুঁইলাম শিরে,
 রাখিলাম তপ্ত ভালে অঞ্জলি ভরিয়া,
 হেরিলাম ছায়া মোর এরি শাস্ত্র নীরে,
 বিছায়ে দিলাম কূলে তৃষাদঙ্ক হিয়া ।
 কে জানে হয়তো কোন্ শুভলগ্নে তুমি
 নেমেছিলে কোতূহলী এরি কোনো ঘাটে ;
 অযাচিত প্রত্যাশায় অঙ্গ তব চুমি
 নেচেছিলো তরঙ্গেরা, প্রসন্ন ললাটে
 অর্থহীন যত কথা বলেছিলে সখী
 তাহারি প্রলাপ আজি উঠিছে ছলকি ।

কে বলিবে কোনোদিন স্নানকালে তব
 অকস্মাৎ হেরি নিজ ছায়া অভিনব,
 শিহরি ওঠেনি বক্ষ ! সে স্মৃতি-রভস
 আজি করি দেয় মোর এ অঙ্গ অবশ ॥

ব্রহ্মপুত্র নদী যবে মাজুলির চরে
 অকস্মাৎ বাধা পেয়ে চমকিয়া উঠি
 কুণ্ঠিত অঞ্চল হ'তে মুক্তা মুঠি মুঠি
 ছড়ায় বিস্ময় আধো সঙ্কোচের ভরে—
 পুষ্প-লঘু হাস্য তব বেপথু-অধরে
 তেমনি একান্ত রস-আবেশেতে ফুটি
 ঝরে যায় মরে যায় পড়ে যায় লুটি
 হঠাৎ পথের বাঁকে দেখ যবে মোরে ।

সাতাশ তারায় গাঁথা রাশিচক্র সম
 বনমল্লিকার মালা, তব কুন্তুলেরে
 ঘেরে ঘন আলিঙ্গনে ; বন্ধ নিরুপম
 শ্যামাইয়া ওঠে ক্রমে ; ঘিরিয়া দেহেরে
 কিঙ্কিণী কঙ্কণ কাঞ্চী করে কাণাকাণি
 —চক্রান্ত বিরুদ্ধে মোর জানি তাহা জানি ॥

শূন্য ব্রহ্মপুত্রচর সীমান্ত অবধি
 অবসন্ন একটানা ; বালুজমি পরে
 বাড়িতেছে তরমুজ, যতদিন নদী
 নাহি জাগে পুনর্ব্বার ; স্নান দিগন্তরে
 গারো পাহাড়ের লেখা ; সন্ধ্যার আঁধার
 নামে ধীরে, ঝিল্লী ডাকে, জোনাকী চমকে,
 বিলম্বিত তরণীর ঘাটে ফিরিবার
 করুণ আহ্বান ক্ষীণ ; অশ্রু মোর চোখে ।

রিক্ত সুধাপাত্র সম অষ্টমীর শশী
 স্থলিত আকাশ প্রান্তে ; হ'ল সমাধান
 সপ্তর্ষির প্রদক্ষিণ ধ্রুবেরে ঘেরিয়া ;
 হঠাৎ পঞ্জর ভেদি উঠিল নিশ্বাসি
 পুরাতন অশ্রুধ্বনি ; কাঁদিল পরাণ
 ওই ওই অতিদূর দিগন্তে চাহিয়া ॥

হিমাদ্রি মেলিয়া বাহু অনন্তের পানে
 ছুটে এসে, এইখানে থেমে গেছে সখী,
 অকস্মাৎ । কি আগ্রহে, মোর চিত্ত জানে,
 শ্যামা বঙ্গভূমি প্রতি রয়েছে নিরখি ।
 বহু নিয়ে পদতলে ক্ষীণ স্বচ্ছ ধারা ;
 নিশ্চপল অরণ্যানী মসি-বিন্দু-রেখা ।
 উপত্যকা মুষ্টিমেয় ; বনস্পতি চারা
 দিখলয় কুহেলীতে নাহি যায় দেখা ।

/ এস এইখানে বসি, আজ শেষ বার
 ওই হাত হাতে দাও, ওই দু'টি আঁখি
 রাখো মোর মুখপরে ; গাঢ় কেশভার
 খুলে যাক্ ; এই মত কিছুক্ষণ থাকি ।
 তারপরে চিরদিন এ হিমাদ্রি প্রায়
 নিষ্ফলে মেলিয়া বাহু চাহিব তোমায় ॥

আজ কি কহিব কথা ! হেরিতেছি দূরে
 গিগি-উপত্যকা হ'তে ওঠে ঘুরে ঘুরে
 গভীর নিশ্বাস-বাষ্প ; অলক্ষ্যে কখন
 আচ্ছন্ন করিয়া দেয় নিস্তব্ধ গগন
 স্নান পাইনের শ্রেণী । ওঠে সেই মত
 দীর্ঘ দুই বরষের কথা ছিল যত—
 সহসা বন্ধনমুক্ত ; সেই মত তারা,
 মুহূর্তে ঢাকিতে পারে আকাশের তারা
 —পৃথিবীর পুষ্পজাল । সেই মত হায়
 ... করিয়া
 এক বিন্দু অশ্রুবারি ।—থাক্ তবে ভাষা,
 থাক্ মিছে মর্ষ-গ্রন্থি প্রকাশের আশা ।

অনন্ত তুষার-পটে থাক্ শুধু লেখা
 এইখানে আমাদের হয়েছিল দেখা ॥

হে হিমাদ্রি, তুমি চির অগম্য বেদের !
 ভারতের শিরদেশে তুমি নিত্যকাল
 দিব্য সমস্তার মত ! কত না যুগের
 সহস্র মনস্বী যত চিন্তাশুকু ভাল
 বসেছে তোমার পায়ে ! একদিন শেষে
 না লভি উত্তর কোনো তব রহস্যের,
 নত মাথে চলি গেছে উত্তরের দেশে
 উত্তরি উত্তুঙ্গ গিরি ।

ওগো হিমাচল

আমি তোমা বুঝিয়াছি ; লভিয়াছি তল
 ধ্যানসরোবর নীরে ; তারি নয়নের
 অলৌকিক আলোকের অপূর্ব ~~আলোকে~~
 রহস্য-স্তিমিত তব কান্তি শোভা পায় ।
 সত্যের শুভ্রতা পরে প্রেমের আলোকে
 সৌন্দর্যের শতদল ফুটিল ছ্যালোকে ॥

তোমারে হেরিয়াছিছু বাংলার মাঠে
 অগ্নি তিস্তা ! বিতরিয়া প্রতি ঘাটে ঘাটে
 হিম্যানীর সন্তাষণ শুক্লিস্বচ্ছ জলে
 অবশেষে মিলাইতে উদাস কুন্তলে
 দিগন্তরে মেঘমান । হেরিতেছি পুন
 এ গিরি-শিখরে নিত্য নর্তন-নিপুণ
 তব্বী মেনকার মত অজস্র প্রলাপে
 উচ্চকি' পাইন বন নামো ধাপে ধাপে ।

তোমারে হেরিয়াছিছু বঙ্গের প্রান্তরে
 কম্পিত মল্লিকাদাম শঙ্কিতচরণা !
 আজি তুমি এ কি রূপে এ হিমাদ্রি পরে
 খর ববি-করে ক্ষীণ একটি ঝরণা !
 হেরিতেছি আজি সখী তোমার অন্তরে
 কি আকৃতি অবিশ্রাম করে আনাগোনা ॥

আমারে দেখিতে চাই তোমার মাঝারে
 হে সুন্দরী অসমীয়া, আমারে বাঁধিতে
 তব আলিঙ্গন ছলে, আমারে সাধিতে
 দুর্গম রহস্যে তব ধাই অভিসারে ।
 নিজেতে নিজের সাধ মিটাতে কি পারে
 রূপবুভুক্ষিত প্রাণ ! এ প্রাণ ভাঙিয়া
 অর্দ্ধাঙ্গিনী করি তোরে গড়িয়াছি প্রিয়া
 আমারে তোমার মাঝে ভালবাসিবারে ।

উত্তর সমুদ্রে কোন্ দিগন্তের ধারে
 অস্তভীক সন্ধ্যাসূর্য্য চেয়ে থাকে যথা
 আপনার প্রতিবিম্বে ভুলিয়া নিখিল ;
 তেমনি তেমনি সখী তোমার মাঝারে
 আপন অস্তিত্ব খুঁজি—এত ব্যাকুলতা-
 তোমার দর্শনে খুঁজি আপনার মিল ॥

মহাকাল-কর-ধৃত অক্ষমালা সম
 শাস্বত নক্ষত্র-জাল রবে আবর্তিতে ;
 তোমার উদ্বেল বক্ষ—এই বক্ষ মম
 তবু কোনো দিন হায় পাবে না ছুঁইতে !
 স্তম্ভিত তুষার সম মহাকাল নিজে
 ধীরে ধীরে গলে' গিয়ে হইবে নিঃশেষ
 তবুও হবেনা জানা—ওই বক্ষে কি যে
 কতখানি সুখা ছিল—কতখানি ক্লেশ !

তৃষ্ণা আর তীব্র বাণে আহত হরিণ
 আপন শোণিতে আঁকি মরণের পথ
 আসে সরোবর কূলে ; কাণে শোনে
 যেন দূর জলধ্বনি ; যবে মুগ্ধবৎ
 হঠাৎ ফিরিয়া হেরে শিয়রেই জল
 তুল্লভ আনন্দে শেষ তখনি সকল ॥

সোনার ~~যৌবন~~মোর পূর্ণপাল ভরে
 ধায়, অস্তাচলগামী । যেথা তুমি ~~সখী~~
 অস্তমান তপনের স্বর্ণবিশ্ব করে
 রহস্য-গভীর তব কুন্তল পরখি
 বিনায়ে বাঁধিছ বেণী । আঁকিছ সিন্দূর
 স্বচ্ছ ললাটের পটে ক্ষীণ চন্দ্র জিনি !
 কার লাগি উন্মুখিয়া স্তনাগ্র-বন্ধুর
 একাগ্রহৃদয় অয়ি, চিরসীমন্তিনী !

কপিল-বিদ্যুৎ-প্রাস্ত বাটিকার মেঘে
 ছুটেছে পূর্ণিমা চাঁদ । আছে যেথা জেগে
 পশ্চিমদিখালা বধু ; উন্মত্ত নাবিক !
 বন্দরে ভিড়িবে যবে নিশান্তে পথিক
 বহুক্ষণ অতিক্রান্ত বাসরের কাল !
 পূর্ণিমার পূর্ণচন্দ্র সৌন্দর্য্য-কাঙাল ॥

ইন্দ্রিয়ের ইন্দ্রধনু ও তনু তোমার
তাই তারে বারম্বার করি নমস্কার ॥

অফুরন্ত সুধাপাত্র ও তনু তোমার
ফুরায়েও চিরপূর্ণ, করি নমস্কার ॥

ও তনু-মৃণাল পরে বিশ্বের বিস্তার
তাই তারে বারম্বার করি নমস্কার ॥

কনক বলয় তব, মুগ্ধ চেতনার
অপার-দিগন্ত রেখা—করি নমস্কার ॥

নিটোল বাসনা সম ও বক্ষ তোমার
প্রণয়ের চিরবেদী—করি নমস্কার ॥

আমার দর্পণ তুমি অস্তিত্ব আমার
তাই সখী তব পায়ে করি নমস্কার ॥

অলোকসম্ভব তনু সব তীর্থসার
তাই তোমা বারম্বার করি নমস্কার ॥



